

ւաբար քրդերի և ասորիների վերայ. դա մի բնական դաշնակցութիւն է, որովհետեւ հայոց խնդիրը, ասում էր Հիւսէյին խանը, միևնոյն քրդերի և ասորիների խնդիրն է, որքան որ հայերը քրդերի և ասորիների զարգացման համար աշխատեն, այնքան էլ իւրեանց գործին կ'օգնեն:

Խանը իւր մտքերի մէջ աւելի շատ առաջ գնաց, որքան ես կարծում էի: Քրդերի և ասորիների մէջ ուսումնարաններ բացանելը ուղղակի հայոց պարտականութիւնն էր համարում նա:

Երբ որ խանը այսպէս խօսում էր, ես տառապում էի, իմ յիշողութեանս մէջ պատկերանում էին մեր ուսումնարանները իւրեանց հոգաբարձուներով և ուսուցիչներով:

Ես ճանապարհորդել եմ, տեսել եմ, ես ինքս ուսուցչութիւն եմ արել, չորս տարի Ագուլիսում, մի տարի Տփլիսում, մի տարի Շուշում: Ես մեր ուսումնարաններին ծանօթ եմ... Ճշմարիտ էր ասում խանը. մեր պարտքն էր բարոյապէս կրթել մեզ հետ դարերով ապրող, շահերով կապված մանրազգերին, ասորիներին, քրդերին, եզիդներին, Քարագոյունցոց և այլն: Բայց խանը չը գիտէր մեր դպրոցների գաղտնիքը, կամ մեր մէջ դպրոցներ որքան տարածուած են, կամ որքան արժանի են դպրոց կոչուելու, ի՞նչ են պատրաստում ապագայի համար: Արտաքին մասը